

## Allannguutissatut siunnersuut

uanga

**Nunatsinni aatsitassat uran-imik akullit aamma qinngornernik ulorianartunik akullit allat piiarneqalissagaluarpata aatsitassat sinnikuinik mingunnaqisunik nunatsinni eqqaaveqartinneqarsinnaanerisa inerteqqutaalersinnissaat siunertaralugu Naalackersuisut suliniuteqaqqullugit peqquneqarnissaannik Inatsisartut aalajangiiffigisassaattut siunnersuut.**

(Aappassaaneerneqarnissaanut Inatsisartunut ilaasortanit ukuusunit saqqummiunneqartoq: Naaja H. Nathanielsen Attaviitsoq, Per Rosing Petersen, Partii Naleraq kiisalu Sara Olsvig aamma Peter P. Olsen, Inuit Ataqtigiit.

1. Aalajangiiffigisassatut siunnersuut ima qulequtaqassaaq:

**Kalaallit Nunaanni qinngornerit naliginnaasumik piusut eqqaassanngikkaanni uran-imik qinngornernillu ulorianartunik akulinnik allanik piiaanissat inerteqqutigineqarnissaat siunertaralugu Naalackersuisut suliniuteqaqqullugit peqquneqarnissaannik Inatsisartut aalajangiiffigisassaattut siunnersuut.**

**Tunngavilersuut:**

Uranisiorfinniit aatsitassat qinngornernik ulorianartunik akullit sinnikuinik eqqaaveqartitsinikkut, allaat illoqarfimmut qanilluinnartumiittumi, siunissaq eqqarsaatigalugu isumakulunnartoqarneranik siunnersuuteqartoq isumaqatigaarput. Tamanna aamma innuttaasorpasuariniit isumakuluutigineqarpoq. Nunanulli allanut sinnikuinik mingutsitsisunik ingerlatitsinikkut aaqqiisinnaaneq pitsaanerpaatut aamma isiginngilarput. Nunani allani mingutsitsisinnissamut kissaateqanngilluinnarpugut. Tamannalu tunngavigalugu allannguutissatut siunnersuummik saqqumiussaqaarpugut.

Siunnersuut siulleg tunngaviatigut uranisiornissamut akerliunermik tunngaveqarpoq. Tamanna uranisiornermi aatsitassanik qinngornilinnik attuilluinnanngeqqusinerup atuutsileqqinneqarnissaannik kissaateqartuniit aallaveqarpoq. Tamanna isumaqatigaarput, taamaattumillu siunnersuutip tunngaviummik apeqqummut tassunga tunngasusariaqarneranik isumaqarluta. Taamaattumillu allannguutissatut siunnersuut manna saqqummiupparput.

Angertut naaggaartullu naaperiarfigisinnaasaattut innuttaasut taasitinneqarnissaat pisinnaavoq. Naaperiaatissatulli siunnersuut tamanna naalackersuisooqatigiinniit akerliuffigineqartuarsimavoq. Aatsitassanik qinngornilinnik attuilluinnanngeqqusinermut siunnersuut saqqummiupparput, massa amerlanerussuteqarsinnaanaviarnata ilisimagaluarlutigu. Taamaattorli Inatsisartuni tapersersorneqarluaqqissinnaavoq. Taamatullu uranisiornissamut aatsitassanullu allanut ulorianartunik qinngornilinnut piiaanissamut naalackersuinikkut nukittuummik pisinnaatitsisoqannginnera ersersinneqaqqissaaq. Soorlumi aamma innuttaasunit pisinnaatitsissut ersarissumik saqquminngitsoq.

Tamanna naalackersuisooqatigiit, Naalackersuisut aningaasaliiumaartullu eqqaamasariaqagaattut qitiusutut pingaaruteqarpoq.

---

Erseqqissarlarpullu: nunatsinni aatsitassarsiornikkut ineriartortitsisoqarnissaanik kissaateqarpugut. Ingerlassallu arlaliusut piareersarneqartut nalunngilarput. Ingerlassat taakkua amerlanersaat allannguutissatut siunnersuummit matumangga attorneqassanngillat. Ingerlassarmi ataasiinnaq attorneqassaaq. Taamaattumillu Kalaallit Nunaanni aatsitassarsiornermik ineriartortitsineq siunnersuummit uannga unitsinneqassanngilaq. Taamatut oqassagaanni tamanna ilumuunngilaq.